

COMPACT DISC DI RUFO WEVER

RIBA MERCADO

ORANJESTAD (AAN): Si e tabata na bida, Diaranzon awor 8 di December e lo a cumpli 76 aña, Rufo Inocencio Wever, kende a revolucionar mundo musical di Aruba, un berdadero genio.

Pescy un grupo di admirador y amigo a dicidi pa uni esfuerso y prepara algo cu lo perdura, esta un Compact Disc di e maestro caminda e conocido pianista Victor

Camacho ta interpreta su musica como si fuera Rufo mes tabata na piano, esta na un forma magistral.

DIARIO a compronde cu danki na intervencion di Aruba Recording Studio y su experticio, e CD a keda tecnicamente inmehorable, e grabacion a bira un berdadero joya cu indudablemente lo brinda alegria den hopi hogar, specialmente den e

dianan di Navidad aki.

Diaranzon awor lo ta recordando su fecha di nacemento, y e Compact Disc aki lo worde bautiza pa 7:30 p.m. durante un ceremonia chiquito den e Casablanca Casino di Aruba Hilton Hotel.

E Compact Disc ta contene 10 di e piezanan mas bunita di Rufo Wever, entre otro e inmortal "Arubanita",

"Souvenir di Aruba", "Glenda y Herbert" cu Rufo a compone pa su dos prome sobrinonan, pa menciona algun di nan.

Riba e Compact Disc aki no ta aparece e pieza "Annette", cu el a compone pa su mama, como cu esey a worde reserva pa algo mas special ainda, riba otro CD cu lo mira luz despues di esaki.

CAHA DI ORGEL DI COMPUTER: E Compact Disc aki tin varios curiosidad, manera un pieza di Caha di Orgel cu a worde traha cu computer y casi bo no ta tende e diferencia.

Tambe por scucha e violinista Sandor kende ta toca tur anochi na Sonesta Hotel, como tambe un cuatro toc pa Doedel Sophia y saxofon, un di e instrumentonan predilecto di Rufo Wever, toca pa Lucio Rivadeneira.

Durante e presentacion Diaranzon lo worde conta

algo di e bida di Rufo Wever, kende a bay den historia como e musico y compositor cu e braza artificial. Ta trata aki di un bida de lo mas interesante.

Pa loka ta e pianista Victor Camacho, e tambe tin un trayectoria musical sumamente exitoso tras di lomba. El a cuminsa na edad di 6 aña ora el a haya su prome les di piano cerca Carmen de Kort, kende actualmente ta kedando na Huize Maris Stella na Savaneta.

Fuera di esey el a haya les cerca Armando Lorenzini, Lucky Leslie Leonor y Rick Elings. Ademas di musica e ta ocupa un funcion importante tambe na Landslaboratorium. E ta conoci como un musico di clase cu ta domina e piano completamente y kende su tocamento ta con corda completamente cu e estilo unico di Rufo Wever. Pues ta trata aki di un berdadero joya.